

Yūnus

Yūnus Allāh se Farār Ho Jātā Hai

¹ Rab Yūnus bin Amittī se hamkalām huā,
² “Baṛe shahr Nīnwā jā kar us par merī adālat
 kā elān kar, kyoñki un kī burāī mere huzūr tak
 pahuñch gaī hai.”

³ Yūnus rawānā huā, lekin mashriqī shahr
 Nīnwā ke lie nahīn balki maḡhribī shahr Tarsīs
 ke lie. Rab ke huzūr se farār hone ke lie wuh Yāfā
 Shahr pahuñch gayā jahān ek bahrī jahāz Tarsīs
 ko jāne wālā thā. Safr kā kirāyā adā karke Yūnus
 jahāz meñ baiṭh gayā tāki Rab ke huzūr se bhāg
 nikle.

⁴ Lekin Rab ne samundar par zabardast āndhī
 bhejī. Tūfān itnā shadīd thā ki jahāz ke ṭukṛē
 ṭukṛē hone kā khatrā thā. ⁵ Mallāh saham gae.
 Aur har ek chīkhtā-chillātā apne dewatā se iltijā
 karne lagā. Jahāz ko halkā karne ke lie unhoñ
 ne sāmān ko samundar meñ phaiñk diyā.

Lekin Yūnus jahāz ke nichle hisse meñ let̄ gayā
 thā. Ab wuh gahrī nīnd so rahā thā. ⁶ Phir
 kaptān us ke pās āyā aur kahne lagā, “Āp kis
 tarah so sakte haiñ? Uṭheñ, apne dewatā se iltijā
 karen! Shāyat wuh ham par dhyān de aur ham
 halāk na hoñ.”

⁷ Mallāh āpas meñ kahne lage, “Āo, ham qurā
 ḍāl kar mālūm kareñ ki kaun hamārī musībat kā
 bāis hai.” Unhoñ ne qurā ḍālā to Yūnus kā nām
 niklā. ⁸ Tab unhoñ ne us se pūchhā, “Hameñ
 batāeñ ki yih āfat kis ke quşūr ke bāis ham par

nāzil huī hai? Āp kyā karte haiñ, kahāñ se āe
haiñ, kis mulk aur kis qaum se haiñ?”

⁹ Yūnus ne jawāb diyā, “Maiñ Ibrānī hūn,
aur Rab kā parastār hūn jo āsmān kā Khudā
hai. Samundar aur ķushkī donoñ usī ne banāē
haiñ.” ¹⁰ Yūnus ne unheñ yih bhī batāyā ki
maiñ Rab ke huzūr se farār ho rahā hūn. Yih
sab kuchh sun kar dīgar musāfiroñ par shadid
dahshat tārī huī. Unhoñ ne kahā, “Yih āp ne
kyā kiyā hai?” ¹¹ Itne meñ samundar mazīd
mutalātim hotā jā rahā thā. Chunāñche unhoñ
ne pūchhā, “Ab ham āp ke sāth kyā kareñ tāki
samundar tham jāe aur hamārā pīchhā chhoṛ^{de}?” ¹² Yūnus ne jawāb diyā, “Mujhe uṭhā kar
samundar meñ phaiñk deñ to wuh tham jāegā.
Kyoñki maiñ jāntā hūn ki yih baṛā tūfān merī hī¹³
wajah se āp par ṭūt paṛā hai.”

¹³ Pahle mallāhoñ ne us kā mashwarā na
mānā balki chappū mār mār kar sāhil par
pahuñchne kī sirtor̄ koshish karte rahe. Lekin
befāydā, samundar pahle kī nisbat kahīñ zyādā
mutalātim ho gayā. ¹⁴ Tab wuh buland āwāz se
Rab se iltijā karne lage, “Ai Rab, aisā na ho ki
ham is ādmī kī zindagī ke sabab se halāk ho jāeñ.
Aur jab ham use samundar meñ phaiñkeñge to
hameñ begunāh ādmī kī jān lene ke zimmedār
na ṭhahrā. Kyoñki jo kuchh ho rahā hai wuh terī
hī marzī se ho rahā hai.” ¹⁵ Yih kah kar unhoñ ne
Yūnus ko uṭhā kar samundar meñ phaiñk diyā.
Pānī meñ girte hī samundar ṭhāthen mārne se
bāz ā kar tham gayā. ¹⁶ Yih dekh kar musāfiroñ
par sakht dahshat chhā gaī, aur unhoñ ne Rab ko
zabah kī qurbānī pesh kī aur mannatēñ mānīñ.

¹⁷ Lekin Rab ne ek barī machhlī ko Yūnus ke pās bhejā jis ne use nigal liyā. Yūnus tīn din aur tīn rāt machhlī ke peṭ meñ rahā.

2

Yūnus kī Duā

¹ Machhlī ke peṭ meñ Yūnus ne Rab apne Khudā se zail kī duā kī,

² “Maiñ ne barī musībat meñ ā kar Rab se iltijā kī, aur us ne mujhe jawāb diyā. Maiñ ne Pātāl kī gahrāiyōñ se chīkh kar fariyād kī to tū ne merī sunī.

³ Tū ne mujhe gahre pānī balki samundar ke bīch meñ hī phaiṇk diyā. Pānī ke zordār bahāw ne mujhe gher liyā, terī tamām lahren aur maujeñ mujh par se guzar gaīn.

⁴ Tab maiñ bolā, ‘Mujhe tere huzūr se khārij kar diyā gayā hai, lekin maiñ tere muqaddas ghar kī taraf taktā rahūngā.’

⁵ Pānī mere gale tak pahuñch gayā, samundar kī gahrāiyōñ ne mujhe chhipā liyā. Mere sar se samundarī paude lipaṭ gae.

⁶ Pānī meñ utarte utarte maiñ pahāroñ kī buniyādon tak pahuñch gayā. Maiñ zamīn meñ dhañs kar ek aise mulk meñ ā gayā jis ke darwāze hameshā ke lie mere pīchhe band ho gae. Lekin ai Rab, mere Khudā, tū hī merī jān ko garhe se nikāl lāyā!

⁷ Jab merī jān nikalne lagī to tū, ai Rab mujhe yād āyā, aur merī duā tere muqaddas ghar meñ tere huzūr pahuñchī.

⁸ Jo butoñ kī pūjā karte haiñ unhoñ ne Allāh se wafādār rahne kā wādā tor̄ diyā hai.

⁹ Lekin maiñ shukrguzārī ke gīt gāte hue tujhe qurbānī pesh karūninga. Jo mannat maiñ ne mānī use pūrā karūninga. Rab hī najāt detā hai.”

¹⁰ Tab Rab ne machhlī ko hukm diyā ki wuh Yūnus ko khushkī par ugal de.

3

Yūnus Nīnwā Men

¹ Rab ek bār phir Yūnus se hamkalām huā,

² “Barē shahr Nīnwā jā kar use wuh paighām sunā de jo maiñ tujhe dūngā.”

³ Is martabā Yūnus Rab kī sun kar Nīnwā ke lie rawānā huā. Rab ke nazdīk Nīnwā aham shahr thā. Us meñ se guzarne ke lie tīn din darkār the. ⁴ Pahle din Yūnus shahr meñ dākhil huā aur chalte chalte logoñ ko paighām sunāne lagā, “Ain 40 din ke bād Nīnwā tabāh ho jāegā.”

⁵ Yih sun kar Nīnwā ke bāshinde Allāh par īmān lāe. Unhoñ ne roze kā elān kiyā, aur chhoṭe se le kar barē tak sab tāt orh kar mātam karne lage.

⁶ Jab Yūnus kā paighām Nīnwā ke bādshāh tak pahuñchā to us ne takht par se utar kar apne shāhī kapron ko utār diyā aur tāt orh kar khāk meñ baiñh gayā. ⁷ Us ne shahr meñ elān kiyā, “Bādshāh aur us ke shurafā kā farmān suno! Kisī ko bhī khāne yā pīne kī ijāzat nahiñ. Gāy-bail aur bher-bakriyoñ samet tamām jānwar bhī is meñ shāmil hain. Na unheñ charne do, na pānī pīne do. ⁸ Lāzim hai ki sab log jānwaroñ samet tāt orh len. Har ek pūre zor se Allāh se iltijā

kare, har ek apnī burī rāhoṇ aur apne zulm-o-tashaddud se bāz āe. ⁹ Kyā mālūm, shāyad Allāh pachhtāe. Shāyad us kā shadīd ghazab ṭal jāe aur ham halāk na hoṇ.”

¹⁰ Jab Allāh ne un kā yih rawaiyā dekhā, ki wuh wāqai apnī burī rāhoṇ se bāz āe to wuh pachhtāyā aur un par wuh āfat na lāyā jis kā elān us ne kiyā thā.

4

Yūnus Allāh kī Mehrbānī Dekh Kar Nārāz Ho Jātā Hai

¹ Yih bāt Yūnus ko nihāyat burī lagī, aur wuh ghusse huā. ² Us ne Rab se duā kī, “Ai Rab, kyā yih wuhī bāt nahīn jo main ne us waqt kī jab abhī apne watan meṁ thā? Isī lie main itnī tezī se bhāg kar Tarsīs ke lie rawānā huā thā. Main jāntā thā ki tū mehrbān aur rahīm Khudā hai. Tū tahammul aur shafqat se bharpūr hai aur jald hī sazā dene se pachhtātā hai. ³ Ai Rab, ab mujhe jān se mār de! Jīne se behtar yihī hai ki main kūch kar jāūn.”

⁴ Lekin Rab ne jawāb diyā, “Kyā tū ghusse hone meṁ haq bajānib hai?”

⁵ Yūnus shahr se nikal kar us ke mashriq meṁ ruk gayā. Wahān wuh apne lie jhoñprī banā kar us ke sāy meṁ baīṭh gayā. Kyonki wuh dekhnā chāhtā thā ki shahr ke sāth kyā kuchh ho jāegā.

⁶ Tab Rab Khudā ne ek bel ko phūṭne diyā jo baṛhte baṛhte Yūnus ke ūpar phail gaī tāki sāyā de kar us kī nārāzī dūr kare. Yih dekh kar Yūnus bahut khush huā. ⁷ Lekin agle din jab

pau phaṭne lagī to Allāh ne ek kīrā bhejā jis ne bel par hamlā kiyā. Bel jald hī murjhā gaī.

⁸ Jab sūraj tulū huā to Allāh ne mashriq se jhulastī lū bhejī. Dhūp itnī shadīd thī ki Yūnus ġhash khāne lagā. Ākhirkār wuh marnā hī chāhtā thā. Wuh bolā, “Jīne se behtar yihī hai ki maiñ kūch kar jāūn.”

⁹ Tab Allāh ne us se pūchhā, “Kyā tū bel ke sabab se ġhusse hone meñ haq bajānib hai?” Yūnus ne jawāb diyā, “Jī hān, maiñ marne tak ġhusse hūn, aur is meñ maiñ haq bajānib bhī hūn.”

¹⁰ Rab ne jawāb diyā, “Tū is bel par ġham khātā hai, hālānki tū ne us ke phalne-phūlne ke lie ek unglī bhī nahīn hilāī. Yih bel ek rāt meñ paidā huī aur aglī rāt khatm huī ¹¹ jabki Nīnwā bahut barā shahr hai, us meñ 1,20,000 afrād aur muta'addid jānwar baste hain. Aur yih log itne jāhil hain ki apne dāeñ aur bāeñ hāth meñ imtiyāz nahīn kar pāte. Kyā mujhe is bare shahr par ġham nahīn khānā chāhie.”

**Kitab-i Muqaddas
The Holy Bible in Urdu, Urdu Geo Version, Roman
Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30